

Poileasaidh Cànan an t-Sabhail Mhòir

Tha soirbheachadh agus cliù na Colaiste gu mòr an crochadh air a' mheud 's a chleachdar a' Ghàidhlig innte. Le àrdachadh ann an ìre Gàidhlig nan oileanach, thig barrachd thugainn, is fuirichidh barrachd nas fhaide, is iad uile an làn dùil gum faigh iad an taic is an togail-inntinn a thathas a' sùileachadh bho ionad làn-Ghàidhlig. Tha am poileasaidh seo ann gus an cleachdadh seo a dhaingneachadh.

- Bidh dleastanasan agus còraichean a thaobh na Gàidhlig aig gach neach aig a' Cholaiste. Tha soirbheachadh agus cliù na Colaiste mar àite Gàidhlig an urra rinn uile.
- A thaobh feallsanachd is poileasaidh cànan na Colaiste, bidh dùil ri stiùireadh làidir bho Phrionnsapal, Stiùirichean agus Cheannardan Roinne na Colaiste.
- Bidh dùil gum bi buidhnean co-cheangailte ris a' Cholaiste a' gabhail ri poileasaidh cànan na Colaiste agus gum bi gach buidheann a' cruthachadh poileasaidh cànan dhi fhèin (le taic bhon Oifigeir Poileasaidh Cànan). Mar phàirt de phoileasaidh gach buidhne, bidh dùil gum bi dleastanas fa leth aig luchd-obrach gum bruidhinn iad a' Ghàidhlig, ma bhios i idir aca, air neo gum ionnsaich iad i, mura bi.
- Bidh dùil gun tèid a' Cholaiste a' riochdachadh mar àite làn-Ghàidhlig do dhuine no do bhuidhinn sam bith a thig a chleachdadh goireasan na Colaiste.
- Bidh dùil gum bi an teagasg tro mheadhan na Gàidhlig a-mhàin agus gum bi sin agus na goireasan teagaisg Gàidhlig nan deagh eisimpleir do na h-oileanach.
- Mar bhun-stèidh a' phoileasaidh, bidh dùil nach cleachd muintir na Colaiste ach a' Ghàidhlig ri oileanach a tha air ìre a' Chùrsa Chomais no a' Chùrsa Adhartais a ruigsinn.
- Bidh dùil ri sgiobadh ann an Roinn nan Goireasan a bhios làidir taiceil an dà chuid do na h-oileanaich agus do luchd-obrach eile na Colaiste le bhith a' cleachdadh agus a' brosnachadh cleachdadh na Gàidhlig air feadh na Colaiste.
- Cuiridh a' Cholaiste a taic ri trèanadh tro mheadhan na Gàidhlig
- Cuiridh a' Cholaiste cuideam air sgaoileadh feallsanachd poileasaidh cànan na Colaiste.
- Cuiridh a' Cholaiste a taic ris a' phrionnsapal gum bu chòir sanasachadh sna pàipearan is eile a bhith sa Ghàidhlig a-mhàin, mar as trice, a rèir feuma.
- Cuiridh a' Cholaiste a taic ris a' phrionnsapal nach bu chòir ach soighnichean Gàidhlig a bhith gan cleachdadh air àrainn na Colaiste.
- 'S e dleastanas an Oifigeir Phoileasaidh Cànan a bhith a' toirt taic do mhuinntir na Colaiste, agus iad a' cur Poileasaidh na Colaiste an gnìomh; a bhith measadh adhartas ann an coileanadh a' Phoileasaidh; agus a bhith a' moladh leasachaidhean anns a' Phoileasaidh dhan Phrionnsapal, mar as iomchaidh.
- Bidh dùil gun tèid adhartas sa Ghàidhlig a mheas gu cunbhalach san luachadh bhliadhnail.
- Bidh dùil gun tèid ceist a' chànan a ghabhail a-steach aig toiseach gnothaich nuair a thèid planaichean ùra a chur ri chèile airson na Colaiste.

	Raon a' phoileasaidh	An neach an urra ris
§1	ADHBHAR A' PHOILEASaidH	
	Tha soirbheachadh agus cliù na Colaiste gu mòr an crochadh air a' mhead 's a chleachdar a' Ghàidhlig innte. Le àrdachadh ann an ìre Gàidhlig nan oileanach, thig barrachd thugainn, is fuirichidh barrachd nas fhaide, is iad uile an làn dùil gum faigh iad an taic is an togail-inntinn a thathas a' sùileachadh bho ionad làn-Ghàidhlig. Tha am poileasaidh seo ann gus an cleachdadh seo a dhaingneachadh.	
§2	FEALLSANACHD	
	(a) A' Cholaiste	
	1. Tha a' Cholaiste na h-àite foghlaim làn-Ghàidhlig agus na h-àite gnìomhachais làn-Ghàidhlig, agus sàbhaladh, brosnachadh agus leudachadh na Gàidhlig nam prìomh adhbhar na Colaiste.	
	2. Bidh abairt-rùin na Colaiste a' nochdadh seo gu làidir.	Prionnsapal Stiùirichean Oifigear Margaidheachd
	3. Bidh margaidheachd is sanasachadh ceangailte ris a' Cholaiste a' nochdadh seo.	Prionnsapal Oifigear Margaidheachd
	4. Cuirear poileasaidh fastaidh ri chèile ach am bi a' Cholaiste a' gluasad a dh'ionnsaigh ama far am bi (a) a' Ghàidhlig aig luchd-obrach uile na Colaiste, agus (b) sgilean Gàidhlig aig luchd-obrach mus tòisich iad aig a' Cholaiste.	Prionnsapal Stiùirichean Oifigear Sgiobachd
	(b) Muinntir na Colaiste	
	Bidh dleasan agus còraichean a thaobh na Gàidhlig aig gach neach aig a' Cholaiste. Tha soirbheachadh agus cliù na Colaiste mar àite Gàidhlig an urra rinn uile.	
	1. Bidh cùmhnant làidir eadar a' Cholaiste agus luchd-obrach agus eadar a' Cholaiste agus oileanaich gum bithear a' cleachdadh na Gàidhlig a rèir an comasan ris a bheileas an dùil air feadh na Colaiste.	Prionnsapal Stiùirichean Ceannardan Roinne
	2. Bidh a' chòir aig luchd-obrach agus oileanaich ri bhith a' sùileachadh ri àrainneachd làn-Ghàidhlig aig a' Cholaiste.	Prionnsapal Stiùirichean Ceannardan Roinne
§3	CEANNAS	
	A thaobh feallsanachd is poileasaidh cànan na Colaiste, bidh dùil ri stiùireadh làidir bho Phrionnsapal, Stiùirichean agus Ceannardan Roinne na Colaiste.	
	1. Bheir Prionnsapal, Stiùirichean agus Ceannardan Roinne na Colaiste stiùireadh làidir a thaobh poileasaidh cànan na Colaiste agus cleachdadh na Gàidhlig air àrainn na Colaiste, le bhith a' cumail spiorad agus facal a' phoileasaidh fa chomhair oileanaich agus luchd-obrach na Colaiste cho tric 's a ghabhas.	Prionnsapal Stiùirichean Ceannardan Roinne
	2. Coinnichidh am Prionnsapal ris an Oifigear Poileasaidh Chànain gach dà mhìos gus suidheachadh na Gàidhlig sa Cholaiste a mheas.	Prionnsapal Oifigear Poileasaidh Cànain
	3. Coinnichidh Ceannardan Roinne ris an Oifigear Poileasaidh Chànain gach dà mhìos gus suidheachadh na Gàidhlig sna roinnean aca fhèin a mheas agus plana gnìomha a chur ri chèile.	Ceannardan Roinne Oifigear Poileasaidh Cànain

§4	BUIDHNEAN CO-CHEANGAILTE RIS A' CHOLAISTE	
	Bidh dùil gum bi na buidhnean seo a' gabhail ri poileasaidh cànan na Colaiste agus gum bi gach buidheann a' cruthachadh poileasaidh cànan dhi fhèin (le taic bhon Oifigear Poileasaidh Chànain). Mar phàirt de phoileasaidh gach buidhne, bidh dùil gum bi dleastanas fa leth aig luchd-obrach gum bruidhinn iad a' Ghàidhlig, ma bhios i idir aca, air neo gun ionnsaich iad i, mura bi. Mar eisimpleir, bidh e na dhleastanas aig luchd-obrach Fàs Mòr a bhith a' bruidhinn na Gàidhlig fad an t-siubhail, an dà chuid air taobh a-staigh an aonaid, nam measg fhèin is ris a' chloinn, agus air taobh a-muigh an aonaid ri buill eile na Colaiste.	
	1. Le taic bhon Oifigear Poileasaidh Chànain, bidh poileasaidh cànan aig gach buidhinn, a bhios, am measg eile, ag aontachadh ri poileasaidh cànan na Colaiste agus a' cur dleastanas air a luchd-obrach fa leth a bhith a' bruidhinn na Gàidhlig no ga h-ionnsachadh a rèir an luachaidh bhliadhnail aca.	Oifigear Poileasaidh Cànan Ceannardan buidhne
	2. Le taic bhon Oifigear Poileasaidh Chànain, cuiridh gach buidheann plana gnìomha bliadhnail ri chèile, le targaidean mionaideach àireamhail na chois.	Oifigear Poileasaidh Cànan Ceannardan buidhne
	3. Bidh luachadh bliadhnail an luchd-obrach a' gabhail a-steach adhartas sa Ghàidhlig.	Ceannardan buidhne
§5	LUCHD-TADHAIL IS BUIDHNEAN BHO THAOBH A-MUIGH NA COLAISTE	
	Bidh dùil gun tèid a' Cholaiste a' riochdachadh mar àite làn-Ghàidhlig do dhuine no do bhuidhinn sam bith a thig a chleachdadh goireasan na Colaiste.	
	1. Ged a bhios buidhnean is luchd-tadhail aig nach eil a' Ghàidhlig a' tighinn a chleachdadh goireasan na Colaiste, gu h-àraid sna saor-làithean, thèid a mhìneachadh dhaibh gur h-e ionad Gàidhlig a th' anns a' Cholaiste.	Ceannard Roinn nan Goireasan
	2. Thèid tachartasan aig buidhnean agus luchd-tadhail bho thaobh a-muigh na Colaiste a shanasachadh agus a thaisbeanadh anns a' Cholaiste fhèin tron Ghàidhlig, aig a' char as lugha le bhith a' cleachdadh na Gàidhlig os cionn no ri taobh na Beurla ann an sanasan, bileagan fiosrachaidh, clàran-bidhe 7c a thèid a sgaoileadh anns a' Cholaiste.	Ceannard Roinn nan Goireasan
§6	RIANACHD	
	5. Bidh dùil gum bi Rianachd na Colaiste a' dèiligeadh ri muinntir na Colaiste tro mheadhan na Gàidhlig.	
	6. Bidh Rianachd na Colaiste a' cleachdadh Gàidhlig a-mhàin air foirmichean is fiosrachadh na Colaiste.	Ceannard Roinne Luchd-rianachd
	7. (i) Uair sam bith a dh'fheumas dreach Beurla de rudeigin a sholaradh, thèid an leughadair a chur gu faidhle air chruth dà-chànanach a gheibhear air Dràibh-G na Colaiste, .i. cha tèid a sgaoileadh air an dòigh àbhaistich. (ii) San fharsaingeachd, bhiodh stuth a bha air tighinn a-steach bho thaobh a-muigh na Colaiste na mhura-bhith, mura bi cothrom ann a' Ghàidhlig a chur air an toiseach. (iii) 'S ann ann an càraidhean air leth sònraichte a-mhàin, m.e. gu daoine aig nach robh cothrom air goireasan coimpiutair na Colaiste, a bhiodh dùil gun sgaoilear stuth dà-chànanach air chruth cruaidh.	Ceannard Roinne Luchd-rianachd
	8. Bidh poileasaidhean na Colaiste an dà chuid (a) air	Ceannard Roinne

	chruth Gàidhlig a-mhàin, agus (b) air chruth dà-chànanach. Gheibhear seòrsa (b) air Dràibh-G na Colaiste a-mhàin.	Luchd-rianachd
	9. Bidh leabhraichean-làimhe luchd-obrach an dà chuid (a) air chruth Gàidhlig a-mhàin, agus (b) air chruth dà-chànanach. Gheibhear seòrsa (b) air Dràibh-G na Colaiste a-mhàin.	Ceannard Roinne Luchd-rianachd
	10. Cleachdaidh muinntir na Colaiste a' Ghàidhlig a-mhàin ann a bhith a' bruidhinn no a' conaltradh ri luchd-obrach na Colaiste agus ri oileanaich na Colaiste bhon Chùrsa Chomais no a' Chùrsa Adhartaich suas.	Ceannard Roinne Luchd-rianachd
§7	ROINN AN FHOGHLAIM	
	(a) An teagasg	
	Bidh dùil gum bi an teagasg tro mheadhan na Gàidhlig a-mhàin agus gum bi sin agus na goireasan teagaisg Gàidhlig nan deagh eisimpleir do na h-oileanach.	
	1. Thèid modalan an dà chuid air àrainn na Colaiste agus aig astar a tha air an clàradh ri bhith air an teagasg sa Ghàidhlig a theagasg tro mheadhan na Gàidhlig a-mhàin, ach le cead a' Phrionnsapail.	Ceannard Roinne Luchd-teagaisg Luchd-oide
	2. Thèid briathrachas iomchaidh an dà chuid airson mhodalan practaigeach agus acadaimigeach a sholaradh agus a leasachadh do dh'oileanaich.	Ceannard Roinne Luchd-teagaisg Luchd-oide
	3. Meudaichear an ceudad de ghoireasan Gàidhlig (notaichean, prìomh theagsaichean 7c) airson mhodalan gach bliadhna.	Ceannard Roinne Luchd-teagaisg Luchd-oide
	4. Fastaidhear ach luchd-teagaisg aig a bheil de Ghàidhlig a fhreagras feumalachdan nan oileanach.	Oifigear Sgiobachd Ceannard Roinne
	5. Cha tèid ach luchd-oide aig a bheil de Ghàidhlig a fhreagras feumalachdan nan oileanach fhadastad, agus air chùmhnannt 's gum bi an luchd-oide a' cleachdadh an cuid Gàidhlig air àrainn na Colaiste.	Oifigear Sgiobachd Ceannard Roinne Stiùiriche Prògram
	6. Feumar cead fhaighinn bhon a' Phrionnsapal gach turas a bhitear an dùil neach-teagaisg no oide aig nach eil a' Ghàidhlig a thoirt a-steach dhan Cholaiste air aoi gheachd.	Ceannard Roinne Stiùiriche Prògram
	7. Thèid ainmean Gàidhlig nam modalan a-mhàin a chleachdadh agus thèid coinneamhan a chumail agus thèid gearr-chunntasan, aithisgean agus sgrìobhainnean eile bho thaobh a-staigh na Colaiste a sgaoileadh sa Ghàidhlig a-mhàin.	Ceannard Roinne Luchd-teagaisg Luchd-oide
	8. Cuiridh Roinn an Fhoghlaim barrachd cuideim air ìre Gàidhlig nan oileanach nan obair sgrìobhte, agus cuirear 10% am Bl. 1, 15% am Bl. 2, 15% am Bl. 3 agus 20% am Bl. 4 de chomharraidhean obair sgrìobhte nan oileanach mu choinneimh na Gàidhlig.	Ceannard Roinne Luchd-teagaisg Luchd-oide
	(b) Na h-oileanaich	
	Mar bhun-stèidh a' phoileasaidh, bidh dùil nach cleachd muinntir na Colaiste ach a' Ghàidhlig ri oileanach a tha air ìre a' Chùrsa Chomais no a' Chùrsa Adhartaich a ruigsinn.	
	1. Cuiridh am Prionnsapal litir (a rèir bliadhna) fa sgaoil ro thoiseach gach bliadhna colaiste, a' mìneachadh dè bhitear a' sùileachadh bho oileanaich a thaobh cleachdadh na Gàidhlig.	Prionnsapal
	2. Thèid feallsanachd na Colaiste agus còraichean nan	Margaidheachd

	oileanach a thaobh cleachdadh na Gàidhlig a shanasachadh am broinn fiosrachaidh a sgaoilear gu oileanaich mus tig iad chun na Colaiste, nuair a thig iad gu agallamh, agus air àrainn na Colaiste gu tric is gu minig am feadh na bliadhna colaiste.	Seirbheis Oileanach Oifigear Poileasaidh Cànan
	3. Nithear cùmhnant làidir gach bliadhna eadar a' Cholaiste agus na h-oileanaich fa leth a thaobh poileasaidh cànan na Colaiste, gum bi fhios aca gum bi aca ri bhith a' cleachdadh na Gàidhlig air feadh na Colaiste agus gum faod iad sùileachadh ri àrainneachd làn-Ghàidhlig air feadh na Colaiste.	Oifigear Clàraidh Seirbheis Oileanach Oifigear Poileasaidh Cànan
	4. Ma bhriseas oileanach a chùmhnannt a thaobh cleachdadh na Gàidhlig air àrainn na Colaiste, dèiligear ris mar gu bheileas air mì-chliù a thoirt air a' Cholaiste (.i. Ìre 3 den mhodh smachdachaidh).	Prionnsapal Ceannard Roinn
	5. Bidh leabhar-làimhe nan oileanach (a) air chruth Gàidhlig a-mhàin, agus (b) air chruth dà-chànanach. Gheibh oileanaich lethbhreac Gàidhlig, le iomradh air càite am faigh iad dreach dà-chànanach air Dràibh-G na Colaiste.	Ceannard Roinn
	6. Cleachdaidh luchd-obrach na Colaiste a' Ghàidhlig a-mhàin ann a bhith a' bruidhinn no a' conaltradh ri oileanaich na Colaiste, bho oileanaich a' Chùrsa Chomais no a' Chùrsa Adhartaich suas.	Luchd-obrach
	7. Bidh ceist mu sgilean Gàidhlig agus mu chleachdadh a' chànan nam pàirt den fhoirm comhairleachadh oileanaich.	Oifigear Poileasaidh Cànan Clèireach Roinn an Fhoghlaim
	8. Cuirear neach-brosnachaidh an sàs aig a' Cholaiste gus a' Ghàidhlig a bhrosnachadh tro bheatha shòisealta nan oileanach.	Prionnsapal Oifigear Sgiobachd Oifigear Poileasaidh Cànan
§8	ROINN NAN GOIREASAN	
	Bidh dùil ri sgiobadh ann an Roinn nan Goireasan a bhios làidir taiceil an dà chuid do na h-oileanaich agus do luchd-obrach eile na Colaiste le bhith a' cleachdadh agus a' brosnachadh cleachdadh na Gàidhlig air feadh na Colaiste.	
	1. Cuirear cuideam iomchaidh air poileasaidh cànan agus cleachdadh na Gàidhlig air àrainn na Colaiste ann an cùmhnantan luchd-obrach, gum bi fhios aca gum bi aca ri bhith a' cleachdadh na Gàidhlig air feadh na Colaiste, gu bheileas an dùil gum bi iad a' leasachadh an cuid chomasan sa chànan, agus gum faod iad sùileachadh ri àrainneachd làn-Ghàidhlig air feadh na Colaiste.	Ceannard Roinne Oifigear Sgiobachd Oifigear Poileasaidh Cànan
	2. Ma bhriseas neach-obrach a chùmhnannt a thaobh cleachdadh na Gàidhlig air àrainn na Colaiste, dèiligear ris mar gu bheileas air mì-chliù a thoirt air a' Cholaiste.	Ceannard Roinne Oifigear Sgiobachd
	3. Atharraichear poileasaidh fastaidh na Colaiste gus an tèid luchd-obrach fhadth air sgàth an dà chuid sgilean obrach agus sgilean cànan.	Ceannard Roinne Oifigear Sgiobachd
	4. Gheibh adhartas anns a' Ghàidhlig prìomh àite ann an luachadh obrach bliadhnail	Ceannard Roinne
	5. Thèid adhartas ann an sgilean Gàidhlig aithneachadh ann an ìre thuarastail.	Ceannard Roinne Oifigear Sgiobachd
	6. Neach-obrach sam bith a bhios airson modal a	Ceannard Roinne

	dhèanamh, bidh aca ri suim airgid a phàigheadh (£50) a gheibhear air ais an dèidh na measaidhean a dhèanamh.	Oifigear Sgiobachd
	7. Cleachdaidh muinntir nan Goireasan a' Ghàidhlig a-mhàin ann a bhith a' bruidhinn no a' conaltradh ri luchd-obrach na Colaiste agus ri oileanaich na Colaiste, bho oileanaich a' Chùrsa Chomais no a' Chùrsa Adhartaich suas.	Ceannard Roinne Muinntir na Roinne
	8. Cha fhrithealaich anns a' bhiadhlan ach luchd-obrach a bhios deònach a' Ghàidhlig a chleachdadh ris na h-oileanaich agus ri luchd-obrach eile.	Ceannard Roinne
	9. Gheibh muinntir nan Goireasan cothrom air dà uair de thìde de chlasaichean Gàidhlig aig a' char as lugha an-asgaidh am broinn na Colaiste a rèir an comasan agus an dòighean-ionnsachaidh nàdarra.	Ceannard Roinne Oifigear Sgiobachd Neach-oide
§9	TRÈANADH LUCHD-OBACH	
	Cuiridh a' Cholaiste a taic ri trèanadh tro mheadhan na Gàidhlig.	
	1. Mura faighear lorg air cuideigin bho thaobh a-muigh na Colaiste a nì cursa trèanaidh tro mheadhan na Gàidhlig, uidheamaichidh a' Cholaiste duine/daoine sa Cholaiste fhèin gus an cùrsa a libhrigeadh air an dàrna turas.	Oifigear Sgiobachd
§10	MARGAIDHEACHD	
	Cuiridh a' Cholaiste cuideam air sgaoileadh feallsanachd poileasaidh cànan na Colaiste.	
	1. Bidh abairt-rùin na Colaiste a' nochdadh poileasaidh cànan na Colaiste gu làidir ann am faclan loma pongail.	Oifigear Margaidheachd
	2. Bidh margaidheachd is sanasachadh ceangailte ris a' Cholaiste a' nochdadh poileasaidh cànan na Colaiste gu làidir, a' cleachdadh cleachdadh na Gàidhlig sa Cholaiste mar adhbhar-ceannaich sònraichte agus mar adhbhar-moit do mhuinntir na Colaiste.	Oifigear Margaidheachd
	3. Sgaoilear feallsanachd poileasaidh cànan na Colaiste am broinn na Colaiste fhèin air feadh na bliadhna.	Oifigear Margaidheachd
	4. Bidh barrachd margaidheachd ann do dh'oileanaich ri teachd mu dheidhinn feallsanachd poileasaidh cànan na Colaiste.	Oifigear Margaidheachd Oifigear Poileasaidh Cànan
	5. Brosnaichear àrainneachd far am bi daoine deònach faighneachd mura tuig iad rudeigin sa Ghàidhlig.	Oifigear Margaidheachd
§11	SANASACHADH	
	Cuiridh a' Cholaiste a taic ris a' phrionnsapal gum bu chòir sanasachadh sna pàipearan is eile a bhith sa Ghàidhlig a-mhàin, mar as trice, a rèir feuma.	Oifigear Margaidheachd
	1. Thèid obraichean a shanasachadh sa Ghàidhlig a-mhàin.	Oifigear Margaidheachd Oifigear Sgiobachd
	2. Feumar cead a' Phrionnsapail fhaighinn gus a' Bheurla a chleachdadh ann an sanasachadh ach, fiù 's le sin, cleachdar barrachd Gàidhlig na Beurla.	Oifigear Margaidheachd Oifigear Sgiobachd
§10	SOIGHNEADH	
	Cuiridh a' Cholaiste a taic ris a' phrionnsapal nach bu chòir ach soighnichean Gàidhlig a bhith gan cleachdadh air àrainn na Colaiste.	
	1. Bidh sanasan, postaran, puist-d. is eile sa Ghàidhlig a-mhàin.	Ceannardan Roinn Ceannardan Buidhne Ceannard Oighreachd
	2. Bidh sanasan èiginn a' cleachdadh dhealbhan agus Gàidhlig a-mhàin.	

	3. Ma bhios adhbhar air Beurla a sholarachadh, cumar seo air chruth dà-chànanach air Dràibh-G na Colaiste.	
§11	OIFIGEAR POILEASaidh CÀNAIN	
	'S e dleastanas an Oifigeir Poileasaidh Cànain a bhith a' toirt taic do mhuinntir na Colaiste, agus iad a' cur Poileasaidh na Colaiste an gnìomh; a bhith measadh adhartas ann an coileanadh a' Poileasaidh; agus a bhith a' moladh leasachaidhean anns a' Phoileasaidh dhan Phrionnsapal, mar as iomchaidh.	
	1. Coinnichidh an t-Oifigear Poileasaidh Cànain ris a' Phrionnsapal gach dà mhìos gus suidheachadh na Gàidhlig sa Cholaiste a mheas.	Oifigear Poileasaidh Cànain Prionnsapal
	2. Coinnichidh an t-Oifigear Poileasaidh Cànain ri Ceannardan Roinne gach dà mhìos gus suidheachadh na Gàidhlig sna roinnean aca fhèin a mheas.	Oifigear Poileasaidh Cànain Ceannardan Roinne
	3. Bidh an t-Oifigear Poileasaidh Cànain na chathraiche do bhuidhinn chomhairleachaidh, le riochdaire às gach roinn agus oileanach bho gach bliadhna oirre; bidh cothrom aig a' bhuidhinn tuilleadh bhall a thoirt a-steach, ma thogras i.	Oifigear Poileasaidh Cànain Oifigear Sgiobachd
	4. Sgrìobhaidh an t-Oifigear Poileasaidh Cànain aithisg bhliadhnail aig deireadh gach bliadhna acadaimigeach mu phoileasaidh cànain na Colaiste agus mu shuidheachadh na Gàidhlig sa Cholaiste le measadh càileachdail agus àireamhail air adhartas ann an coileanadh a' Phoileasaidh anns a' bhliadhna roimhe, a thèid chun a' Phrionnsapail.	Oifigear Poileasaidh Cànain Prionnsapal
	5. Sgrìobhaidh an t-Oifigear Poileasaidh Cànain plana gnìomha aig deireadh gach bliadhna acadaimigeach airson na bliadhna ri teachd, stèidhichte air Poileasaidh na Colaiste, a' tarraing air gach roinn dhen Cholaiste agus le targaidean àireamhail mionaideach na chois.	Oifigear Poileasaidh Cànain Ceannardan Roinne Prionnsapal
	6. Cuiridh an t-Oifigear Poileasaidh Cànain sgeamannan innleachdail air dòigh aig a' Cholaiste gus buannachd agus cleachdadh na Gàidhlig a bhrosnachadh, a' tarraing air eisimpleirean eadar-nàiseanta de dheagh ghnè ann an dealbhadh cànain am broinn buidhne.	Oifigear Poileasaidh Cànain
§12	NEACH-BROSNACHAIDH	
	'S e dleastanas an neach-brosnachaidh a bhith a' neartachadh cleachdadh na Gàidhlig ann am beatha shòisealta na Colaiste.	
	1. Cuiridh an neach-brosnachaidh sgeamannan agus tachartasan air dòigh do mhuinntir na Colaiste, agus gu sònraichte dha na h-oileanaich, a bhios ag amas gu sònraichte air cleachdadh na Gàidhlig a mheudachadh air taobh a-muigh an t-seòmair-theagaisg, a' tarraing air eisimpleirean eadar-nàiseanta de dheagh ghnè ann an dealbhadh cànain am broinn buidhne.	Neach-brosnachaidh Oifigear Poileasaidh Cànain
	2. Cumaidh an neach-brosnachaidh leabhar-latha dhe na sgeamannan agus tachartasan a chuireadh air dòigh, le measadh cruthach air an t-soirbheas ann am brosnachadh cleachdadh na Gàidhlig. Thèid lethbhreac dhen leabhar-latha dhan Oifigear Poileasaidh Cànain gach mìos agus gearr-chunntas dhen leabhar-latha chun a' Phrionnsapail gach semeastar.	Neach-brosnachaidh
§13	MEASADH A' PHOILEASaidh	
	Luachadh leantainneach a' phoileasaidh.	

	1. Thèid poileasaidh cànan na Colaiste a mheas gu bliadhna, le aithisg leis an Oifigear Poileasaidh Cànan mu phoileasaidh cànan na Colaiste agus mu shuidheachadh na Gàidhlig sa Cholaiste, a' moladh atharrachaidhean mar as iomchaidh; thèid an aithisg air adhart gu Prionnsapal agus Stiùrichean na Colaiste.	Oifigear Poileasaidh Cànan Prionnsapal Stiùrichean
	2. Thèid poileasaidhean nam buidhnean co-cheangailte a mheas fa leth gach bliadhna.	Oifigear Poileasaidh Cànan Ceannardan Buidhne
	3. Bidh buidheann comhairleachaidh ann, agus riochdairean bho na diofar roinnean agus bho na diofar bhliadhnaichean oileanaich oirre, agus an t-Oifigear Poileasaidh Cànan na chathraiche, gus am bi cothrom bruidhinn, deasbaid, rannsachaidh agus fiosrachaidh air ais ann.	Oifigear Poileasaidh Cànan Oifigear Sgiobachd
	4. Coinnichidh an t-Oifigear Poileasaidh Cànan ris a' Phrionnsapal gach dà mhìos gus suidheachadh na Gàidhlig sa Cholaiste a mheas.	Oifigear Poileasaidh Cànan Prionnsapal
	5. Coinnichidh an t-Oifigear Poileasaidh Cànan ri Ceannardan Roinne gach dà mhìos gus suidheachadh na Gàidhlig sna roinnean aca a mheas.	Oifigear Poileasaidh Cànan Ceannardan Roinne
	6. Thèid feumalachdan is beachdan luchd-obrach a thaobh cleachdadh na Gàidhlig a thrusadh aig àm an luachaidh bhliadhnail.	Oifigear Poileasaidh Cànan Ceannardan Roinne Oifigear Sgiobachd
§14	LUACHADH BLIADHNAIL	
	Bidh dùil gun tèid adhartas sa Ghàidhlig a mheas gu cunbhalach san luachadh bhliadhnail.	
	1. Bidh adhartas sa Ghàidhlig agus feumalachdan an neach-obrach nam pàirt riatanach de luachadh bliadhnail gach neach-obrach.	Ceannardan Roinne
	2. Bidh gach neach-obrach a' lionadh ceisteachan mu na sgilean agus feumalachdan cànan aice/aige gach luachadh bliadhnail, a thèid a thilleadh gu Oifigear Sgiobachd na Colaiste ach an tèid in-sgrùdadh cànanach a dhèanamh air.	Oifigear Sgiobachd Ceannardan Roinne
§15	LEASACHADH AIG SABHAL MÒR OSTAIG	
	Bidh dùil gun tèid ceist a' chànan a ghabhail a-steach aig toiseach gnothaich nuair a thèid planaichean ùra a chur ri chèile airson na Colaiste.	
	1. Bhon fhìor toiseach, bidh dealbhadh cànan (a' gabhail a-steach dealbhadh inbhe, dealbhadh corpais, dealbhadh cleachdaidh agus dealbhadh buannachaidh) an cois dealbhadh a thaobh leasachadh, atharrachadh no leudachadh sam bith ann an goireasan, àrainn no cùrsaichean na Colaiste.	Oifigear Poileasaidh Cànan Stiùriche Leasachaidh Ceannard Oighreachdan Stiùriche an Fhoghlaim Stiùriche Ionmhais